



Centimetres
TIPPEN Color Control Patches
© The Tiffen Company, 2007



44.199
4437
535



東坡集卷之五十六

尺牘

與朱康叔十九首


以下俱黃州

某啟武昌傳到手教繼辱專使墜簡感服併深比日尊體佳勝節
 物清和江山秀美府事整辦日有勝遊恨不得陪從耳雙壺珍貺
 一洗旅愁甚幸甚幸佳果收藏有法可愛可愛拙疾乍到不諳風
 土所致今已復常矣子由尚未到真寸步千里也未由展奉尚冀
 以時自重

二



軾東坡氏著



東坡集卷三十一
令子歸侍左右日有庭闈之樂恨未際見不敢輒奉書近見提舉
司薦章稍慰輿議可喜可喜作累竹人近爲少閒暇俟宛轉求得
常續致之呵呵酒極醇美必是故人特遣下廳也某再拜

三

某啟專使至復領手教契愛愈厚可量感服仍審比日起居休勝
爲慰舍弟已部賤累到此平安皆出餘庇不煩念及珍惠雙壺遂
與子由屢醉公之德也隆暑萬萬以時自重行膺殊用人還上謝

四

某再拜近奉書并舍弟書想必達胡掾至領手教具審起居佳勝
兼承以舍弟及賤累至特有厚貺羊麪酒果一捧領訖但有慚忤
舍弟離此數日來教尋附洪州遞與之

五

已遷居江上臨臯亭甚清曠風晨月夕杖履野步酌江水飲之皆
公恩庇之餘波想味風義以慰孤寂尋得去年六月所寫詩一軸
寄去以爲一笑酷暑萬乞保練

六

某啟暑毒不可過百事墮廢稍疎上問想不深訝比日伏想尊履
佳勝別乘過郡承賜教及惠新酒到此如新出壘極爲珍竒感愧

不可言因與二三佳士會飲同感德也秋熱更望保練行膺峻陟
七
胡掾與語如公之言佳士佳士渠方寄家齊安時得與之相見也
令子必且盤桓待不中前示論姻親事可留示年月日恐求親者
欲知之造次造次

八

某啟因循稍疎上問不審近日尊候何如某蒙庇如昨秋色益佳
郡事稀少有以爲樂耶無緣展奉但積思仰乍冷萬冀以時自重
郭寺丞一書乞指揮送與其人甚有文雅必蒙青顧也聞其墜馬
傷手不至甚乎

九

某啟近附黃岡縣遞拜書必達專人過此領手教具審起居佳勝
勿復淒冷此歲行盡會合何時以增悵然唯祈善保

十

敷文宅計此月末方離陳南河淺澀想五六月間方到此荷公憂
恤之深其家固貧甚然鄉中亦有一小莊子且隨分過也歸老之
說恐未能如雅志又修理積弊已就倫次監司朝廷豈有遽令放
閑耶問及物食天漸熱難久停恐空煩費也海味亦不若食既忝

東坡集卷五十六
三
雅契自當一一奉白

十一

示諭親事專在下懷然此中殊少士族若有所得當立上聞也要字俟少閑續上納墨竹如可尊意當取次致左右畫者在此不遠必可求也

十二

某啟近王察推至辱書承起居住勝方欲裁謝又枉教墨益增感愧數日來偶傷風百事皆廢今日微減尙未有力區區之懷未能詳盡也乍暄惟冀以時珍攝稍健當上問次

十三

閣名久思未獲佳者更乞詳示閣之所向及側近故事迹爲幸董義夫相聚多日甚歡未嘗一日不談公美也舊好誦陶潛歸去來常患其不入音律近輒微加增損作般涉調哨遍雖微改其詞而不改其意請以文選及本傳考之方知字字皆非創入也謹作小楷一本寄上却求爲書拋磚之謂也亦請錄一本與郭元弼爲病勸不及別作書也數日前飲醉後作頑石亂篠一紙私甚惜之念公篤好故以奉獻幸檢至

十四

身城集卷之二十六
令子必在左右計安勝不敢奉書舍弟已到官聞筠州大水城內
丈餘不知虛的也屏贊視銘無用之物公好事之過不敢不寫裝
成迭去乞一覽少事不免上干聞有潘原秀才以買樸事被禁某
與其兄潘丙解元至孰最有文行原亦是佳士有舉業望賜全庇
暑月得早出爲此人父母皆篤老聞之憂恐萬端公以孝義各世
必能哀之恃舊干瀆不敢逃罪

天覺出藍之作本以爲公家寶而公乃輕以與人謹收藏以鎮篋
笥然尋常不揆輒以亂道塵獻想公亦隨手將與人耳呵呵

十五

與可船旦夕到此爲之泫然想公亦爾也子由到此須留他住五
七日恐知之前曾錄國史補一紙不知到否因書畧示諭蒙寄惠
生煮酒四器正濟所乏極爲珍感生酒暑中不易調停極佳然閔
仲叔不以口腹累人某每蒙公眷念遠致珍物勞人重費豈不肖
所安耶所問菱翠至今虛位雲乃權發遣耳何足掛齒牙呵呵馮
君方想如所論極煩留念又蒙傳示秘訣何以當此寒月得暇當
試之天覺亦不得書此君信意簡率乃其常態未可以疎數爲厚
薄也酒法是用菘豆爲麩者耶亦曾見說來不會錄得方如果佳
錄示爲幸

十六

見元章書中言當世之兄馮君處有一草伏朱砂法甚奇惟康叔
可以得之不知曾得未若果得不知能見傳否想於不肖不惜也

十七

今日偶讀國史見杜羔一事頗與公相類嗟嘆不足故書以奉寄
然幸勿示人恐有嫌者江令功爾深可罪然猶望公憐其才短不
逮而已屢有干瀆蒙不恠幸甚幸甚其令章憲今日恐到此知之
杜羔有至性其父河北一尉而卒母非嫡經亂不知所之會堂
兄兼爲澤潞判官嘗鞫獄於私第有老婦辯對見羔出入竊語

人曰此少年狀類吾夫訊之乃羔母也自此迎侍而歸又往訪
先人之墓邑中故老已盡不知所在館於佛寺日夜悲泣忽視
屋柱煤烟之下見數行字拂而視之乃云遺迹云我子孫若求
吾墓當於某村家問之羔哭而往果有老父年八十餘指其丘
隴因得歸塋羔官至工部尚書致仕此出唐李肇國史補近偶
觀書嘆其事頗與朱康叔相似因書以遺之元豐三年九月二
十五日記

十八

近日隨例紛冗有疎上問不審起居何如兩日來武昌如聞公在

東坡集卷五十一
告何也豈尊候小不佳乎無由躬問左右但有馳系冬深寒澀尤
宜慎護

十九

童質夫求琵琶詞不敢不寄呈安行言有一旣濟鼎樣在公處
若鑄造時幸亦見爲作一枚不用甚大者不罪不罪前日人還曾
附古木叢竹兩紙必已到今已寫得經藏碑附上令子推官侍下
計安勝何時赴任未敢拜書也

荅李康年一首

向承寵訪教語甚厚因循未及裁謝復枉專使辱書累幅意愈勤
重日獲所著通言二篇及新詩碑刻廢學之人徒知愛其文之工
妙而不能究極其意之所至欽味反覆不能釋手幸甚幸甚比日
起居何如竊想著書講道馳騁百氏而游於藝學有以自娛忘其
窮約也通言畧獲披味所發明者多矣謹且借留得爲窺觀他書
豈敢輒留他日別爲小字寫草書見惠不必心經乃大賜也要跋
尾謾寫數字不稱妙筆

荅虔倅俞括一首

軾頓首資深使君閣下前日辱訪寵示長牋及詩文一篇伏讀數
日廢卷拊掌有起予之歎孔子曰辭達而已矣物固有是理患不

知知之患不能達之於口與手所謂文者能達是而已文人之盛莫如近世然私所敬慕者獨陸宣公一人家有公奏議善本頃侍講讀嘗繕寫進御區區之忠自謂庶幾於孟軻之敬主且欲推此學於天下使家藏此方人挾此藥以待世之病者豈非仁人君子之至情也哉今觀所示議論自東漢以下十篇皆欲酌古以馭今有意於濟世之用而不志於耳目之觀美此正平生所望於朋友與凡學道之君子也然去歲在都下且一醫工頗藝而窮慨然謂僕曰人所以服藥端爲病耳若欲以適口則莫如芻豢何以藥爲今孫氏劉氏皆以藥顯孫氏期於治病不擇甘苦而劉氏專務適口病者宜安所去取而劉氏富倍孫氏此何理也使君斯文未必售於世然售不售豈吾儕所當挂口哉聊以發一笑耳進宣公奏議有一表輒錄呈不須示人也餘俟面謝不宣

荅范景山一首

自離東武不復拜書疎怠之罪宜獲譴於左右矣兩辱手教存撫愈厚感愧不可言卽日起居住勝知局事勞冗殊甚景山雖去軒冕避津要所欲閒耳而不可得乃知吾道艱難之際仁人君子捨衆人所棄猶不可得然憂喜勞逸無非命者出辦此身與之浮沉則亦安往而不適也軾始到彭城幸甚無事而河水一至遂有爲

魚之憂近日雖已減耗而來歲之患方未可知法令周密公私置
乏舉動尤難直俟逐去耳久不聞徐論頌鄙無所鑄發恐遂沮沒於
流俗矣子由在南都亦多苦事近詩一軸拜呈冗迫無佳意思但
堪公笑耳近齋居內觀於養生術似有所得子由尤爲造入景山
有異書秘訣尙可見教乎餘非面莫盡惟乞萬萬自重

與陸固朝奉一首

杭侔

某啟久留屬疾不敢造請負愧已深茲者啟行又不往別悚怍之
至謹奉手啟代達

與李無悔一首

某啟久留浙中過辱存顧最爲親去既去又承追餞最遠自惟衰
拙衆所鄙棄自非風義之篤何以至此既別但有思詠兩辱書教
具審起居佳勝今歲科舉聞且就鄉里承示喻進取之意甚倦盛
時美才何遽如此且勉之決取爲望新文不惜見寄未緣集會惟
萬萬自重不宣

荅漢卿一首

某啟辱教承起居佳勝爲慰知不久入城遂當一見何幸如之地
黃煎已領感忤適自局中還熱甚懣塞奉書地黃煎蒙寄惠極佳
姜蜜之劑甚適宜也仰煩神用愧感不可言

與何浩然一首

人還辱書且喜起居佳勝寫真竒妙見者皆言十分形神甚篤真也非故人倍常用意何以及此感服之至所要詩稍暇作寫去雙幅已令蜀中織造至使竒納未卽會見千萬珍重

荅李秀才元一首

以下俱徐州

熱甚竟不再別悵仰殊深辱教承起居佳勝寵惠皆竒筆雅制刻荷無已仁者之惠誠足慰彼黎庶然不知者以爲見教以是搖之呵呵安道舍弟當具道盛意乍遠萬乞保重卽復顯用以慰士望

荅晁君成一首

苦寒審尊履佳勝新文極爲精妙久不見之甚慰喜莊子用志不分乃疑於神古語以疑爲似耳如易陰疑於陽世俗不知乃改作凝不敢不告人還草草

荅呂熙道二首

以下俱湖州

平時企詠賢者獨恨隔闕耳既至浴下謂當朝夕繼見而病與人事奪之又迫於行忽遽捨去可勝嘆耶別來方欲上問先辱手教益增悚怍比日起居何如後會不可期惟萬萬以時自重

二

南都住半月恍然如一夢耳思企德義每以悵然舍弟朴納寡徒

東坡集卷三十一
非長者輕勢重道誰肯相厚者湖州江山風物不類人間加以事
少睡足真拙者之慶有幹不外

與道甫一首

昨日特蒙不外鄙拙袖出盛文相不辭贍格老覽之令人墮墮忘
倦非大手筆未易至此受教良多不敢擅爲巾笥之藏謹令人歸
納文府伏乞視至未審從人何日成行亦須示諭

與錢世雄一首

以下俱
黃州

久不奉書蓋無便亦懶忘之罪未深訝否比日起居何如某與賤
累如常曾託施宣德附書及退教經跋尾必達也吳江宦況如何
僚有佳士否垂虹聞已復舊信否旅寓不覺歲復盡江上久居益
可樂但終未有少田生事漂浮無根耳兒子明年二月赴德興人
口漸少當稍息肩餘無可慮會合何時萬萬自愛因便往三衢奉
啟

答君瑞殿直一首

春來未嘗一日閒欲去奉謁遂成食言愧辱書承起居住佳勝爲
慰君猷知四月末乃行猶可一見否乍暄惟萬萬自重

與景倩一首

昨日辱訪大慰久渴經宿起居住佳勝食已本欲奉謁適陳季常來

東坡集卷三十六
故且已衆客頗懷公高論可能只今一訪否禮不當爾意公期我
我於度外也

與趙仲修二首

奢病不往見而仁人敦舊屢承車馬感愧不可言雨涼切惟起居
佳勝旦夕當獲面謝

二

公清貧更煩輟惠羊邊謹以拜賜使我有數日之飽公亦乃無淡
旬蔬食耶一喙

與何聖可一首

辱示朱先生所著書詩詞義深矣淺學會不足以窺其萬一結髮
求道篤老不衰世間有幾人而匏繫於此不得一望其履慕慨嘆
不已久廢筆硯無以報此嘉貺益增愧赧

與運判應之一首 登州還朝

冬日不接奉渴仰殊深大熱伏想起居佳勝承旦夕啓行無緣往
別鄉里何幸被蒙豈弟之政但望石遠去有識所嘆也衝犯酷暑
千萬自愛

與張正已一首

特承訪別愧企良深晴寒起居安勝寶月書信并念二姪一書煩

東坡集卷三十六
從者附行不訝不訝正寒衝冒千萬加愛

荅呂元鈞三首

以下俱翰林

適辱教值局中不卽荅悚息悚息熱甚尊體佳安隆暑衝冒何不
少待秋涼必亮此意非面莫盡香不欲附去恐損其人之高節紛
紛之議未聞其詳可否示諭餘俟朝中可既

二

中間承進職雖少慰人望然公當在廟堂此豈足賀也此間語言
紛紛比來尤甚士大夫相顧避罪而已何暇及中外利害大計乎
示諭但閔然而已非久季常人行當盡區區

三

屢與令子語欽愛才美但尚屈大官未厭公論耳季常近得書亦
見黃州人言體氣頗安壯但口眼微動耳來求藥物已寄去餘具
令子曰白

荅史彥明主簿一首

別後冗懶相因不果上問愧企增劇遠辱書教感服深矣比日起
居何如衰病懷歸請郡未獲何時展奉少道宛結歲晚厚愛少慰
區區

二

新寧想未赴上前所欲發書至時可示諭也程懿叔去後旅思牢
落聞已到郡矣寄惠秋石極感留意新春龍鶴菜根有味舉箸想
復見憶耶

與家復禮一首

前日辱訪別悵戀不已陰寒起居住否送行詩別寫得一本都勝
前日書者復納去遠道萬萬自重

荅王聖美一首

杭州
還鄉

昨日庭中望見喜慰久渴辱教伏承尊體佳勝無緣造門尚冀避
逅復少須臾人還布謝草草

與王正夫二首

逝中辱書人至復枉手示併增感慰卽日起居如宜襄事薄遽哀
苦至矣無由助執紼臨紙惋歎尚冀寬中毋毀以就遠業

二

大年哀詞恨拙訥不盡盛德聊塞孝心萬一何日西行傾想之極
曹子方因會致區區

三

惠示誌文伏讀感嘆拙詞何足刻石媿媿子方見過聞動止爲慰
餘非面莫究

荅楊禮先三首

新歲日欲往見紛紛未由辱簡承尊體已安復感慰兼集厚貺玆
皮石硯蠟燭物意兩重不敢違命但有媿灼

二

話別草草惘然不已信宿起居佳勝明日果成行否拙詩聊發笑

三

久闊暫聚喜慰不可言但苦都下紛紛不盡款意別來思仰增劇
亟辱手教承已到郡起居康福眷愛各無恙寄示石刻暴揚鄙拙
極爲悚怍衰病懷歸又復歲暮牢落可知切想坐穎之餘日與相

舊往還此樂可羨也

與潮守王朝請滌二首

承寄示士民所投牒及韓公廟圖此古之賢守留意於教化者所
爲非簿書俗吏之所及也顧不肖何足以記此公意旣爾衆復過
聽亦不敢固辭但道行冗甚未暇成之願稍寬假遁中附往也子
野誠有過人公能禮之甚善向蒙寵惠高文欽味不已但老懶廢
學無以塞盛意悚怍而已

二

承諭欲撰韓公廟碑萬里遠意不敢復以淺陋爲詞謹以撰成付

來价其一已先遁矣卷中者乃某手書碑樣止令書史錄去請依碑樣止模刻手書碑首既有大書十字碑中不用再寫題目及碑中既有太守姓名碑後更不用寫諸官銜位此古碑制度不須徇流俗之意也但一切依此樣仍不用周回及碑首花草欄界之類只於淨石上模字不着一物爲佳也若公已替卽告封此簡與吳道人勾當也

與汪道濟二首

以下俱
潁州

專使至辱書感服存記且審比來起居佳勝甚慰馳仰未卜會見惟祈保練

二

某見報移汶上而勅未下老病不堪寄任方欲力辭未知得免否令子日夕相見甚安知之

與明父權府提刑一首

到官半歲依庇德字獲遂解去感服深矣臨行寵餞再三益愧眷厚別後切想起居住佳勝某已達泗上迎送人等謹遣還府今日留一節晚遂發去逾遠左右回望悵然尚冀保練以須顯拜

與鞠持正二首

以下俱
揚州

兩日薄有秋氣伏想起居住佳勝蜀人蒲永昇臨孫知微水圖四面

頗爲雄爽杜子美所謂白波吹素壁者頌公齋中真可以一洗
殘暑也近晚上謁次

二

知腹疾微作想卽平愈文登雖稍遠百事可樂島中出一藥各白
石芝者香味初若嚼茶久之甚美聞甚益人不可不白公知也白
石芝狀如石耳而有香味惟此爲辯秘之秘之

荅劉無言一首 南遷

此行但有感恩知罪省分絕欲守此四言之終身庶保餘年得
還田畝但未知有無後命爾

與林濟甫二首 以下俱
儋耳

眉兵至承惠書具審尊體佳勝眷愛各安某與幼子過南來餘皆
留惠州生事狼狽勞苦萬狀然胸中亦自有儻然處也今日到海
岸地名通角塲明日順風卽過矣回望鄉國真在天末留書爲別
未間遠惟以時自重

二

某兄弟不善處世並遭遠竄墳墓單外念之感涕惟濟甫以久要
之契始終留意死生不忘厚德

與鄭嘉會二首

舟人回奉狀必達比日起居住勝貴眷令子各安某與過亦幸如
昨初賃官屋數間居之既不佳又不欲與官員相交涉近買地起
屋五間一龜頭在南汙池之側茂林之下亦蕭然可以杜門面壁
少休也但勞費貧窘耳此中枯寂殆非人世然居之甚安況諸史
滿前甚可與語者也著書則未日與小兒編排齊整之以須異日
歸之左右也小客伍介石者有士君子之趣起屋一行介石躬其
勞辱甚於家隸然無絲髮之求也顧某念之有可以照庇之者幸
不惜也死罪死罪柯仲常舊有契因見道區區

二

邁後來相見否久不得其書聞過房下臥病正月尙未得耗亦憂
之公爲取一書求瓊州海舶或來人之便封題與瓊倅黃宣義託
轉達甚幸也見說瓊州不論時節有人船便也衆妙堂記一本寄
上本不欲作適有此夢夢中語皆有妙理皆實云爾僕不更一字
也不欲隱沒之又者養生事無可醞釀者故出之

與錢志仲三首

以下俱
北歸

兩日不見渴仰兼懷竊惟起居佳勝昨日水東尋幽訪古頗有所
得恐欲知之藥方已領感感

二

東坡集卷三十一
流落晚塗始獲瞻奉顧遇之重有過平生幸甚幸甚別來伏惟起居佳勝漲水遂失顛險不覺到吉皆德庇所及其餘未易一一道謝也日遠後會未期豈免悵戀

三

某去此不復滯留至安居處當縷細馳問不敢外輒用手啟恃深眷也烏絲當用寫道書一篇非久納上惡詩不足錄也事簡客稀高堂清風有足樂者想時復見念耶吉州幕柳致與之久故知其吏幹過人不能和衆多獲嫌忌然其實無他也憔悴將老矣念非大度盛德孰能收而用之試以衆難必有可觀者藥有毒乃龍已疾馬不蹄齧多拙於行惟深念才難勿責全也若公遂成就之此子極有可採必爲門下用恃明照僭言死罪死罪

荅王莊叔二首

遠辱教書具道三十年前都下與先人往還伏讀感滄仁人念舊手簡見及足矣書辭累幅禮意莊重此何過也伏審斬焉在疚哀慕之餘起居如宜某罪廢遠屏有玷知識重蒙獎飾衰朽增光會合未期尚冀節哀自重

二

某多病杜門人事都絕懶習已成筆硯殆廢承長牋寵貺裁謝荷

簡愧負深矣黃茆海瘴正坐於秋蒸暑麾汗不能盡意思之

與宋漢傑二首

某初仕卽佐先公蒙顧遇之厚何時可忘流落濶遠不聞昆仲息耗每以惋歎辱書累幅話及疇昔良復慨然三十餘年矣如隔晨耳而前人彫喪畧盡僕亦僅能生還人世一大夢俛仰百變無足怪者唐輔令兄今復何在未及奉書因信畧道區區某只候水來卽行矣餘留百盡

二

前日裁謝草畧重煩問訊眷意俞厚感愧不已仍審起居佳勝寵賜新詩詞格甚美伏讀慰喜但恨衰晚無以當此嘉貺也

荅虔人王正彥一首

辱信承起居佳勝沐饋遺重增感灼茗布領抹皆珍物已捧領訖今日與家人輩遊東禪及景德如相訪就彼亦可

荅王幼安二首

索居八年未嘗一通問每以慚負屢得許下兒姪書云北來親族或斷往來唯幼安昆仲待遇加厚聞之感激人來辱書累幅陳義慨然如接古人語信王謝風氣傳之有自也老病強荅不復成語不罪不罪

二

某初欲就食宜與今得子由書苦勸歸穎昌已決意從之矣舟已至廬山下不久當獲造謁未間冀若時保齋

三

蒙示諭過重雖愛念如此然憂患之餘未忘憂畏朋友當思有以保全之者過實之譽願為掩諱之也許暫假大第幸甚幸甚非所敢望也得託庇偏廡謹不敢薰污稍定居當求數畝荒隙結茅而老焉若未即填溝壑及見伯仲功成而歸為鄉里房舍客伏臘相勞問何樂如之餘非面莫究

與寇君一首

經宿雨涼起居住勝昨辱迂顧稍聞餘論退想忠愍之英烈有槩乎中衰病不出無緣上謁少選解去惟萬萬自重

與楊濟甫十首 京師

為別忽已半歲傾想之懷遠而益甚即日起居何如貴眷各安吉自離家至荆南數次奉書計並聞達前月半已至京一行無恙得臘月中所惠書甚慰遠意見在西園賃一宅子居住恐要知悉春暄未緣會見千萬珍重珍重

以下俱
鳳翔

奉別三更歲律思渴日深即日履此新春起居多勝貴聚各嘉安
某前月十四日到鳳翔十五日已交割訖人事紛紛久稽裁問想
自尊君襄事後來漸獲閑靜營幹諸事必且濟辦某此與賤累如
常今因范元歸奉書露聞氣候漸和更希珍重

三

冬寒遠想起居住佳勝此去替不兩月更不能歸鄉且入京去逾遠
依黯近得王道矩書云朝夕一來此相看告便如適中惠一書貴
知道矩幾日起發此幹告早及某只十月十七八間離岐下也

四 以下俱除
喪罷朝

某近領臘下教墨感服眷厚兼審起居佳勝某此與賤累如常舍
弟差入貢院更半月可出都下春色已盛但塊然獨處無與爲樂
所居廳前有少花園課童種菜亦有少佳趣傍宜秋門皆高槐古
郁一似山居頗便所往也漸暖惟千萬珍重

五

適中屢得數書知尊體佳勝貴眷各安示及發適引目契勘得並
到但鄉親書皆五六十日不獨濟甫也府推之命只是暫權發遣
更月餘正官到卽仍舊管官誥院也府中冗絆非拙者所樂恐知
都所須示及

六

近領來書喜知眠食佳安某此與賤累皆安陳州舍弟並安不煩
念及久客都下桂玉所迫囊裝並竭今冬積雪四五尺儼若弊陋
殊無聊惟日望一差遣出去耳未由披奉千萬珍重

七 杭倅

久不奉書亦少領來信思念不去心不審卽日起居住否眷愛各
無恙某此安健官滿本欲還鄉又爲舍弟在京東不忍連年與之
遠別已乞得密州風土事體皆佳又得與齊州相近可以時得沿
牒相見私願甚便之但歸期又須更數年瞻望墳墓懷想親舊不

覺潛然未緣會同惟冀順時自重

八 潁州還朝

久以私撓不作書累蒙惠問且審起居佳勝爲慰衰年責咎移殃
家室此月一日以疾不起痛悼之深非老人所堪奈何奈何又以
受命出帥定武累辭不獲須至勉強北行家事寥落懷抱可知因
見青神王十六秀才亦爲道此會合何時臨書淒斷惟千萬順時
自愛

九 以下俱
儻耳

寶月師孫來得所惠書喜知尊體佳勝眷聚各清安至慰至慰某

凡百粗遣北歸未有期信命且過不煩念及惟聞墳墓安靖非濟
甫風義之篤何以得此感荷不可言舟師云當一到眉此中諸事
可問其詳也遠祝惟若時珍重而已

十

遠蒙厚惠蜀紙藥物等一一如數領訖感忤之至人行速無佳物
克信謾寄腰帶一條俗物增愧不罪不罪

與楊子微二首

以下俱北歸

某與尊公濟甫半生濶別彼此髮鬚雪白而相見無期言之悽斷
尊公乃令閣下萬里遠來海外訪其生死此乃古人難事聞之感
歎不已辱書具審起居安尊公已下各得安勝至慰之極某七
月中必達穎昌矣回馭少留一須欵見餘祝若時自重

二

某與舍弟流落天涯墳墓免於樵牧者尊公之賜也承示諭感愧
不可言聞井水嘗竭而復溢信否見今如何因見細喻

與王慶源十二首

以下俱密州

陵州遞中辱書及詩如接風論忽不知萬里之遠也即日履茲秋
暑尊候何似某此粗遣雖有江山風物之美而新法嚴密風波險
惡況味殊不佳退之所謂居閑食不足從官力難任兩事皆害性

一生常苦心正此謂矣知叔文年來頗窘此事有定分但兄以安
健無事多子孫為樂亦可自遣何時歸休得相從田里但言此心
已馳於瑞草橋之西南矣秋暑更冀以時珍重

二

高密風土食物稍佳但省租公庫減削索然貧儉始至值歲饑人
豪剽劫無虛日凡督捕姦兇五七十人近始肅然鬪訟頗簡稍葺
治園亭居之亦粗可樂但時登高西南引領即悵然終日近稍能
飲酒終日可飲十五銀盞他日粗可奉陪於瑞草橋路上放歌倒
載也

徐州

久以官冗不暇奉問忽辱手訊喜知車從已達輦下起居住勝即
日南宮必榜出矣淪屈已久必遂了當欣賀良深來書謙抑過當
四方赴者甚眾豈獨吾叔元昆勸駕良合事宜恨此拘繫無緣於
東華門外奉接京師一別二十餘年豈惟吾儕衰老可嘆至於都
城風物事體索然無復往時矣東南守官極可樂而民間感迫不
聊生懷抱殊不佳深願慶源了當後千萬一來相從數月少慰平
生幸勿以他事為辭至懇至懇

四 黃州

窮僻少便久不上狀竊惟退居以來尊體勝常黑頭謝事古今所
六賢二疎師傳淵明縣令均爲高退昔人初不爲優劣也謹以此
爲賀二子學術成就瑞草橋果木成陰臥想數年出仕無一可愧
者此又有餘味矣除却虛名外物不知又太師何以加此想當一
笑也某蒙恩量移汝州回念墳墓心目斷絕方作舟行何時得到
汝到後又須營辦生事此身漂然奉羨何及乍熱惟萬萬順候自
重

五 黃州

竄逐以來日欲作書爲問舊既懶惰加以閑廢百事不舉但慙作
而已卽日體中何如眷愛各佳某幼累並安但初到此喪一老乳
母七十二矣悼念久之近亦不復直懷寓居官亭俯迫大江几席
之下雲濤接天扁舟草履放浪山水間客至多辭以不在往來書
疏如山不復答也此味甚佳生來未嘗有此適知之免憂近文郎
行寄紙筆與叢郎到甚遲也未緣面會惟萬萬自愛

六 以下俱登
州還朝

近辱書并寄新詩伏讀感慰不已屬多事未及繼和不審比來尊
體何如貴眷各均安某凡百如昨夢想歸路如痿人之不忘起也
溽暑向隆萬乞以時保養

七

令子兩先輩必大富學術非久騰輝矣五五哥五七哥及十六郎
 臨行冗迫不果拜書因見道意登州下臨漲海枕簟之下大水相
 連蓬萊三山彷彿可見春真間常見海市狀如烟雲為樓觀人物
 之象數日前偶見之有一詩錄呈為笑也史三儒長老近蒙書冗
 中未及荅因見乞道區區海市詩可轉呈也京師有幹乞示下

八

久不奉狀愧仰增積即日遠想起居住勝叔丈脫屣縉紳放懷用
 里絕人遠矣某罪廢流落今復強顏周行有愧而已若聖恩憐其

老鈍年歲間乞與一鄉郡歸陪以屢復講昔日江上携壺藉草之

樂只是不得換脚相迭先發遣一酒壺歸瑞草橋於義儉矣記得否呵呵何幸如之未間惟望厚自願

養以享無疆之壽

九

遠沐寄示老手高風詠歎不已甚欲和謝公私紛紛少暇竟未果
 悚悚七八兩秀才各計安為學想日益早奮場屋慰親意也知宅
 醞甚奇日與蔡子華楊君素聚會每念此即致仕之興愈濃也示
 諭要畫酒後信手豈能復佳寄一扇一小軸去作笑耳

十 以下俱翰林

久不奉狀愧仰增積卽日退居多暇尊體勝常某進職北扉皆出
獎庇自頃流落江湖日欲還鄉追陪杖屨爲江路藉草之遊夢想
見之今日國恩深重憂責殊大報塞愈難退歸何日西望惋悵殆
不勝懷想叔丈與丈人及諸姪歲時相遇樂不可名雖清貧難堪
然熬波之餘必及鵠原應不甚寂寞也歲晚苦寒伏乞保重

十一

近奉慰疏必達比日尊體何如其與幼弱凡百粗遣人生悲樂過
眼如夢幻不足追惟以時自娛爲上策也某名位過分日負憂責
惟得幅巾還鄉平生之願足矣幸公千萬保愛得爲江邊攜壺藉
草之遊樂如之何

十二

久不奉書愧仰兼極令姪元直遠訪首出教字感慰之懷未易盡
陳比日履茲春和尊體何如某爲郡粗遣衰病懷歸日欲致仕旣
忝侍從理難驟去須自藩鎮乞小郡自小郡乞宮觀然後可得也
自數年日夜營此近已乞越雖未可知而經營不已會當得之致
仕有期則拜見不遠矣惟望倍加保養庶歸鄉日猶能陪侍杖屨
上下山谷間也楮冠玳簪聊表遠意玳簪已七八十年物閱數名
公矣幸服用之

與王慶源子 潁州

某自去歲聞宣義叔丈傾逝尋適中奉慰疏必已聞達爾後紛冗少暇繼以行役不定久闕書問愧悚不已叔丈平昔以文行著稱鄉閭於場屋晚乃少遂終不振顯惟望昆仲力學砥礪以顯揚不墜爲心乃末戚區區之望也因信惠一二字

與蒲誠之五首

以下俱京師

某啟聞軒馬已至多時而性懶作書不因使齋手教來雖有傾渴之心終不能致一字左右也悚愧悚愧盛熱殊不可過承起居佳裕甚善甚善某此並無恙京師得信亦安但近得山南書報伯母於六月十日傾背伯父之喪未及一年而災禍仍重如此何以爲心家兄惟三哥在左右大哥二哥必取次一人歸山南謀扶護還鄉也人生患難至有如此極者煩惱煩惱知郡事頗簡足以尋繹舊學也同僚中有可與相處而樂者否新收倅皆在此常相見恐知悉殘暑更冀順時珍重

二

近聞員秘丞言聞於誠之韓益州欲令誠之替某若得請固所喜幸也然某盡今歲方及二年不知朝廷肯令某成資解去否若必俟三考則於誠之爲太淹緩安用也向經由時甚恨不欵曲今若

因此得從容接奉何喜如之陳文日日見甚安

三


聞車騎已在一曲卽見風采喜慰可知冒寒行李不易久此僻左獲奉清游幸甚也

四

今日比欲更接清話少頓而人事紛紛至今不得暫息欲奉謁次聞府官盡出接張省造須至旦出城恐訝不來走此聞達

五

長安之別忽然改歲伏計履茲新春起居增慶某明日至府謁口預增欣抃然不免有少事干聒爲本府帶得接新戎兵士數十人比謂到京却中途逢本官行李頗闕事欲告於貴府添差防護廂軍十餘人昨本有防護二十人爲華州減却十人但只依元數亦差較也告早爲擘畫某更不住後日絕早發去也恃卷喫喋啗嘖驥幸爲留念



早發志也

華山越味十

華裕吉成

蘇帶縣

東坡集卷之五十七

尺牘

眉山蘇軾東坡氏著

與蒲廷淵 徐州

河中永洛出棗道家所貴事見真諸唐有道士侯道華嘗得無核者三食之後竟竊鄧太主藥上昇君到彼試求之但恐得之不偶然非力求所能致耳

與蒲傳正一首

以下俱黃州

千乘姪屢言大舅全不作活計多買書畫奇物常典錢使欲老弟苦勸公卑意亦深以為然歸老之計不可不及今辦治退居之後

東坡集卷二十一
決不能食淡衣麤杜門絕客貧親知相干決不能不應副此數事
豈可無備不可但言我有好兒子不消與營產業也書畫奇物老
翁近年視之不啻如糞土也縱不以鄙言爲然且看公亡錫面少
留意也

與巢元修一首

日日望歸今日得文甫書乃云昨日始與君瑞成行東坡荒廢春
筍漸老餅餤已入末限聞此當俟駕耶老兄別後想健某五七日
來苦壅嗽殊甚飲食語言殆廢矧有樂事今日漸佳近日牢城失
人燒蕩十九雪堂亦危潘家皆奔避堂中飛燭已燎簷矣幸而先
生兩瓢無恙四柏亦吐芽矣

與王庠五首

軾啟二卒遠來承手書累幅問勞教誨憂備盡仍審侍奉多暇
起居萬福感慰深矣軾罪責至重士不忍誅止竄嶺海感恩念咎
之外不知其他來書開說過當非親朋相愛保全之道悚息悚息
寄示高文新詩詞氣比舊益見奇偉粲然如珠貝溢目非獨鄉閭
世不乏人爲喜又幸珍材異產近出姻戚數日讀不釋手每執以
告人曰此吾家王郎文也老朽廢學久矣近日尤不近筆硯見少
時所作文如隔世事他人文也足下猶欲使議論其間是顧千里

東坡集卷三十一
於伏櫪也軾少時本欲遊竄山林父兄不許迫以婚宦故汨沒至
今南遷以來便自處置生事蕭然無一物大畧似行脚僧也近日
又苦痔疾呻吟幾百日緣此斷葷血鹽酪日食淡麵一斤而已非
獨以愈疾實務自枯槁以求寂滅之樂耳初欲獨赴貶所兒女輩
滄泣求行故與幼子過一人來餘分寓許下浙中散就衣食既不
在目前便與之相忘如本無有也足下過相愛乃遣萬里相問無
狀自取旣爲親友憂及又使此兩人者蒙犯瘴霧崎嶇往來吾罪
大矣寄遺藥物并方皆此中無有芎尤奇味得日食以禦瘴也軾
爲舊患痔今頗發作外無他故不煩深念會晤無期惟萬萬以時

保練

二

軾啟前後所寄高文無不達日每見增歎但恨老拙無以少荅來
貺又流落海隅不能少助聲名於當時然格力自天要自有公論
雖欲不顯揚不可得也程夫子尚困場屋王賢良屈爲州縣皆造
物有不可曉者海隅風土不甚惡亦有佳山水而無佳寺院無上
人無醫藥杜門食淡不飲酒亦粗有味也目昏倦作書又此信發
書極多不能詳盡察之察之

三

承欲往黔南見黃魯直此古人所難若果爾真一段奇事也然足下久違親庭遠適更請熟慮今謾寫一書若果行卽攜去也

四

念七娘遠書且喜侍奉外無恙自十九郎遷逝家門無空歲三叔翁大嫂繼往近日又聞柳家小姑凶訃流落海隅只有哀慟此懷可知兄與六郎却且安健幸勿憂也因侍立阿家畧與道懇不敢拜狀也

五

別紙累幅過當老病廢忘豈堪英俊如此責望也少年應科目時記錄各數沿革及題目等大畧與近歲應舉者同爾亦有少節目文字才塵忝後便被舉王取去今日皆無有然亦無用也實無捷徑心得之術但如君高材強力積學數年自有可得之道而其實皆命也但早意欲少年爲學者每讀書皆作數過盡之書富如入海百貨皆有之入之精力不能兼收盡取但得其所欲求者耳故願學者每次作一意求之如欲求古人興亡治亂聖賢作用但作此意求之勿生餘念又別作一次求事迹故實典章文物之類亦如之他皆倣此此雖迂鈍而他日學成入向受敵與涉獵者不可同日而語也甚非速化之術可笑可笑

與王序一首

某啟忝姻戚末未嘗修問左右及方得罪屏居敢望存記及之專
人遠來辱牋教累幅稱述過重慰勞加等幸甚即日履茲秋暑尊
體何似某仕不知止臨老竄逐罪垢增積玷汗親友足下昆仲曲
敦風義萬里遣人問安否此意何可忘書詞雅健陳義甚高但非
不肖所當也蜀粵相望天末何時會合臨書惘惘未審投任何地
來歲科詔佇聞峻擢以慰願望未間更乞若時自重人還奉啟少
謝萬一不宣

謝呂龍圖三首

以下俱京師

龍圖閣老執事某西蜀之鄙人幼承家訓長知義方粗識名教遂
豎晚節兩登進士舉一中茂才科故當世名公巨卿亦嘗賜其提
挈愛憐之意故歐公引之於其始韓公薦之於其中今又閣下舉
之於其後自惟末學辱大賢者之知出自天幸然君子之心以公
而取士某小人之志終荷恩以歸心但空省循何由論報比者止
於片言隻字謝德於門下而其誠之所加意有所不能盡意之所
至言有所不能宣故其見於筆舌者止此而已惟高明有以容而
亮之

前以拙納上塵聽覽方懼獲罪於門下而無以容其誅又辱荅教
言辭欵密禮遇優隆而褒揚之句有加於前日此不肖所以且喜
且懼而莫知所措也珍函已捧受訖謹藏之於家以爲子孫之美
觀鄙屋之陋復生光彩陳根之朽再出英華乃閣下暖然之春有
以嫗育成就之故也擇日齋沐再詣閣下臨紙澀訥情不能宣伏
惟恕其愚

三

某久以局事汨沒殊不獲覲止竊惟應得疎絕之罪於左右不意
寬仁含垢察其俗狀之常情恕其藹畧之小過元降書辭曲加勞
問拜貺之際益增喜顏且夕詣賓次盛暑伏惟爲朝廷自愛上副
注倚之心下慰輿人之望

荅王龍圖一首

辱簡承孝履如宜新詩寵行甚幸但稱道太過非所以安不肖也
餘所諭謹在意

荅張主簿一首

密州

改歲無緣展慶伏惟履茲新春百福來集旬日前辱教感服眷厚
不卽馳荅悚怍悚怍向日披奉但有馳仰餘寒冀以時自重

荅宋寺丞一首

徐州

軾自假守彭城卽欲爲一書以問左右久苦多事竟爲足下所先
慚悚不可言也來書稱道過當皆非無狀所能髣髴自少小爲學
不過以記誦篆刻追世俗之好真所謂寡見淺聞者也年大以來
雖所謂寡淺者亦復廢忘至於吏道法令民事簿書期會尤非所
長素又不喜從事於此以不喜之心強其所不長其荒唐繆悠可
知也而彭城自漢以來號爲重地朝廷過采其虛名不知其實無
有也而輕以畀之自到郡以來夏旱秋潦繼之以橫流之災札瘥
之餘百役毛起公私騷然未已也計其不治之聲聞於左右者多
矣仁人君子不指其過教其所不造而更譽之何也孔子曰居是
邦也事其大夫之賢者友其士之仁者自今與足下往來相聞知
不徒爲好而已當有以告我者不勝大願適會夫役起無頃刻閒
暇書不能盡意惟深察之

與樂推官一首

以下俱黃州

叠辱臨訪欲少欵奉多事因循繼以臥病愧負深矣數日起居住
否知明日啟行無緣面別尚冀保練慰此區區

荅李寺丞二首

久別渴詠逝中辱書且審起居清勝至慰至慰某謫居粗遣廢棄
之人每自嫌鄙況於他人君獨收卹有加平素風義之厚足以愧

激頽靡也未緣會見萬萬以時自愛

二

遠蒙分輟清俸二千極愧厚意然長者清貧僕所知也此不敢請
又重違至意輒請至年終來春即納上感愧不可言也僕雖遭憂
患狼狽然譬如當初不及第即諸事易了荷憂念之深故以解懸

與徐司封一首

適辱車騎寵存感忤無窮晚來尊體佳勝某與陳君畧出至安國
遂覺拙疾稍作欲告明日少休後日恭與盛集可否無狀慙負多
矣幸甚

與周主簿一首

罪廢衰朽過辱臨顧增愧汗也晚來起居勝勝甚欲詣謝巾褐草
野不敢造門幸加矜恕

與李廷評一首

離黃州

某啟經由特辱枉訪適以臥病數日及連日會集殊無少暇治行
忽遽不及請謝明日解維遂爾違闊豈勝愧負

與知縣十首

以下俱
翰林

紛冗久疎上問辱書感愧比日履茲春溫起居何如未山展奉徒
深渴仰尚冀保練以慰區區

東坡集卷三十一
二
近屢辱書數裁謝但苦冗中不盡意耳比日起居何如惠笋已拜
賜新味之味遠能分惠感愧無已

三
類不誨感服勤眷乍暄伏計尊體佳勝前去當入府果爾否

四
近者疊辱臨訪紛冗中不盡所懷枉手教具審起居住勝感慰兼
集何日復入城得少款聚未間萬萬自重

五
近辱回教感慰深矣比日履茲伏暑起居清勝咫尺莫由會遇引
領來塵庶幾少盡區區未間萬萬自重

六
人來辱手教承比日起居住勝思企高義未緣款奉臨書悵惘示
諭書醉公石固佳但日昏罷倦每書過百十字輒意闌恐日夕少
暇耳毒熱萬萬以時自重

七
近日雖獲一再見終不盡區區辱書言別又不卽裁荅可量愧悚
宿昔稍涼起居勝常景物漸嘉邑事多暇想有以爲樂此外萬萬

自重

八

疊辱手教感慰兼集邑事清簡起居勝常小兒蒙不鄙外荷德殊深矣未由接奉千萬以時自重

九

兒子遂獲託庇知幸魯鈍多不及事惟痛與督勸也切祝切祝晉卿相見殿門外惘然如夢中人也人世何者非夢耶亦不足多談但喜其容貌蔚然如故非有過人能如是耶

十

昨日辱示佳篇詞韻高絕非此句無以發揚醉公也雨冷起居佳否二碑納上

荅青州張秘校一首

杭州還朝

承攜長箋下訪不克迎奉爲愧經宿伏惟尊履佳勝示諭乃宰物者之事非不肖所能致也幸賜深亮

與王賢良一首

揚州還朝

近辱臨訪連日紛冗不及款奉竊惟起居佳勝寵示新作感服至意

與惠州都監一首

惠州

東坡集卷三十一
君南來清節幹譽爲有識所稱皆曰此東坡弟子出門下客也兩
漢之士多起於游徼卒史至公卿者多矣願君益廣問學以期遠
對

與子安兄七首 黃州

近於城中得荒地十數畝躬耕其中作草屋數間謂之東坡雪堂
種蔬接果聊以忘老有一大曲寄呈爲一笑爲書角大遠路恐被
拆更不作四小哥哥及諸親知書各爲致下懇巢三見在東坡
安下依舊似虎風節愈堅師授某兩小兒極嚴常親自煮豬頭灌
血睛作薑豉菜羹宛有太安滋味此書到日相次歲猪鳴矣老兄

嫂圍坐火爐頭環列兒女墳墓咫尺親眷滿目便是人間第一等
好事更何所羨可轉此紙呈子明也近購獲先伯父親寫謝蔣希
魯及第啟一通躬親標背題跋寄與念二今寄還二哥哥因書問取

二 以下登
州還朝

拜違十八年終未有省侍之期歲行書但有懷仰卽日履茲寒凝
尊體康勝姪男女各長成東塋每煩昭管感涕不可言某到不旬
日又有起居舍人之命方力辭免年歲間當請一鄉郡歸去漸謀
退省耳未卽瞻奉萬乞以時自重

三

東坡集卷三十一
子由亦有司諫之命想不久到京東瑩芟松甚煩照管如更合芟
間告兄與楊五哥畧往覩當分明點數根槎交付佃戶免致接便
偷砍也不然與出榜立賞召人告偷斫者亦佳一切告留意相度
阿膠半斤真阿井水煮者青州貢棗五斤充信而已京師有幹乞
示及

四以下俱揚
州還朝

十九郎兄弟遠至特蒙手誨恭審比來尊體佳勝甚慰繫望骨肉
久別乍聚問訊親舊但有感嘆知兄杜門守道爲鄉里推愛弟久
客倦遊情懷常不佳日望歸掃墳墓陪侍左右耳方暑敢冀以時

自重

五

往蒙先伯父車迹但有感滯專在卑懷重承誨諭惶悚之至正
兄追不不敢久留來使未暇寫諸親知書乞爲致意非久徧發也

六

墓表又於行狀外尋訪得好事皆參驗的實石上除字外幸不用
花草及欄界之類才著欄界便不古花草尤俗狀也唐以前碑文
皆無告昭管模刻仔細爲佳不罪不罪

七

東坡集卷三十一
每聞鄉人言四九五九兩姪爲學勤謹事舉業尤有功審如此吾
兄不亡矣惟深念負荷之重益自修飭乃是顏閔之孝賢於毀頓
遠矣此間五郎六郎乍失母毀痛難堪亦以此戒之矣吾兄清貧
遭此固不易處某亦爲一年兩喪困於醫藥殯歛未有以相助且
只令楊濟甫送二千爲一奠餘俟少暇也

與子明兄一首

黃州

兄才氣何適不可而數滯留蜀中此回必免衝替何似一人來寄
家荆南單騎入京因帶少物來遂謀江淮一住計亦是一策試思
之他日子孫應舉宦游皆便也弟亦欲如是但先人墳墓無人照
管又不忍與子由作兩處兄自有三哥一房鄉居莫可作此策否
又只恐亦不忍與三哥作兩處也吾兄弟俱老矣當以時自娛世
事萬端皆不足介意所謂自娛者亦非世俗之樂但胸中廓然無
一物卽天壤之內山川草木蟲魚之類皆是供吾家樂事也如何
如何記得應舉時見兄能謳歌甚妙弟雖不會然常令人唱爲作
詞近作得歸去來引一首寄呈請歌之送長安君一盞呵呵醉中
不罪

與史氏太君嫂一首

惠州

某謫海南狼狽廣州知時姪及第流落中尤以爲慶乃知三哥平

生孝義廉靜自守嫂賢明教誨有方天不虛報也明日當渡大海聊致此書嫂知意而已

與聖用弟三首

以下俱揚州還朝

聖用小二秀才弟別後冗迫不即奉書想未訝也此日體中佳安今日榜出且喜小十捷解喜慰之極此郎君爲學勤至文詞成就來春必殊等也前賀無疑向聞弟當復入來想必成行也小十甚安健日久相見不用憂未相會間千萬保愛子由爲朝陵去未及奉書

二

十郎司理不及別作書初官但事事遵稟小二叔教誨官事勿苟簡公勤靜恕勿急求舉主曹事辦集上官必不汝遺劉漕行父叔與之契舊因見但道此意俟到定州欵曲作書也餘惟侍奉外多愛夜中目昏不成字勿訝勿訝

三

方叔兄未及拜書且爲致意子安二哥近有書未及再上狀因見亦爲致懇

與子由弟十首

以下俱黃州

或爲予言草木之長常在昧明間早起伺之乃見其拔起數寸竹

笋尤甚夏秋之交稻方含秀黃昏月出露珠起于其根纍纍然白

騰上若推之者或綴于莖心或綴于葉端稻乃秀實驗之信然此二事與子由

養生之說契故以此為寄

二

子由為人心不異口口不異心心即是口口即是心近日忽作禪

語豈世之自欺者耶欲移之於老兒而不可得如人飲水冷暖自

知死生可以相代禍福可以相共惟此一事對面相分付不得珍

重珍重

三

任性逍遙隨緣放曠但盡凡心無別勝解以我觀之凡心盡處勝

解卓然但此勝解不屬有無不通言語故祖師教人到此便住如

眼翳盡眼自有明醫只有除翳藥何曾有求明方明若可求即還

是翳固不可於翳中求明即不可言翳外無明而世之昧者便將

頽然無知認作佛地若如此是佛猶兒狗子得飽熟睡腹搖鼻息

與土木同當恁麼時可謂無一毫思念豈可謂貓兒狗子已入佛

地故凡學者但當觀心除愛自麤及細念念不忘會作一自得無

所除第以教我者是如此否因見一偈警策孔君不覺悚然更以

問之書至此牆外有悍婦與夫相歐詈聲飛灰火如猪嘶狗嗥因

念他一點圓明正在猪嘶狗吠裏面譬如江河鑿物之性長在飛沙走石之中尋常靜中推求常患不見今日鬧裏忽捉得些了如何如何元豐六年三月二十五日夜已封書訖復以此寄子由

四

某近絕少過從賓客知其衰懶不能與人爲輕重見顧者漸少殊可自幸昨且偶見子華歎老弟之遠外久之蒙見囑聞過必相告近者舉劉太守一事體面極生不免有議論君弟大節過人而小事或不經意正如作詩高處可以追配古人而失處或受嗤於拙日薄俗正好點檢人小疵不可不留意也

五 杭州

明日兄之生日昨夜夢與弟同自眉入京行利州峽路見二僧其一僧鬚髮皆深青與同行問其向去灾福荅云向去甚好無灾問其京師所須要好朱砂五錢又手擎一小那塔中有舍利兄接得那塔自開其中舍利粲然如花兄與弟請吞之僧遂分爲三分僧先吞兄與弟繼吞之各一兩掬細大不等皆明瑩而白亦有飛迸空中者僧言本欲起塔却吃了弟云吾三人肩各置一小塔便了兄言吾等三人便是三所無縫塔僧笑遂覺覺噎噎然微似舍物夢中甚明故閑報爲笑

六 赴定州

某爲迫行事冗不及作孫子發書乞爲致意近者奏辟吏部胥子初妄執言本官係合入遠人礙辟舉及反覆詰之迺始伏云若今年九月二十七日日本官成資後別無遺闕卽不該入遠可以奏辟某尋有公文申部乞會問本州卽見得成資已前有無遺闕凡爭數日乃肯據狀會同請與孫子發言畧說與本州官員言早與果決分明回一成資無遺闕文字來免爲猾胥妄生枝節或更孫宜德與一願就及本州官員及所填替非有服親一狀尤佳京師大抵官不事事而吏橫也

七 惠州

惠州市井寥落然猶日殺一羊不敢與仕者爭買時囑屠者買其

脊骨耳骨間亦有微肉熱煮熱漉出

不乘熱出則
抱水不乾

漬酒中點薄鹽

炙微燠食之終日挾剔得銖兩於肯綮之間意甚喜之如食蟬螯率數日輒一食甚覺有補子由二年食堂庖所食芻豢沒齒而不得骨豈復知此味乎戲書此紙遺之雖戲語實可施用也然此說行則衆狗不悅矣

八 以下俱
北歸

子由弟得黃師是遣人賫來二月二十二日晝喜知近日安訊兄

在真州與一家亦健行計南北凡幾變矣遭值如此可歎可笑兄

近已決計從弟之言同居潁昌行有日矣適值程德孺過金山往

會之并一二親故皆在坐頗聞北方事有決不可往潁昌近地居

者事皆可信人所報大抵相忌安排今已決計居常州借得一採

家宅極佳浙人相喜決不失所也更留真十數日便渡江往常逾

年行役且此休息恨不得老境兄翁相聚此天也吾其如天何然

亦不知天果於兄翁終不相聚乎上君子作事但只於省力處行

此行不遂相聚非本意甚省力避害也候到定疊一兩月方遣邁

去注官迨去般家過則不離左右也葬地翁請一亩果決八郎婦

可用吾無不可用也更破千緡買地何如留作葬事千萬勿徇俗

也林子中病傷寒十餘日便卒所獲幾何遺具無窮哀哉哀哉兄

萬一有稍起之命便具所苦疾狀力辭之與迨過閉戶治田養性

而已千萬勿相念保愛保愛今託師是致此書

九

程德孺兄翁出銀二百星相借兄度手下尚未須如此已辭之矣

德孺兄翁意極佳感他感他數日執甚舟中揮汗寫此不及作語

姪書且伸意夫人晚年更且慎護勿令少有疾副子孫意五郎婦

更與照管慰安之便令五郎往般挈也八郎續親極好但吾儕難

東坡全集卷三十一
自言可託人與說今師是已除太僕卿恐遂北行兄不能見又恐
其省母蘇州若見當令人探其意也少留真欲葺房繕令整齊也
五娘七娘近皆得書與孫皆安胡郎亦有書來甚安行見之矣文
九作書寫字精好無勞問訊伯翁可喜符亦早卓報二姊知
十
吾兄弟俱老矣當以時自娛此外萬端皆不足介懷所謂自娛者
亦非世俗之樂但胸中廓然無一物即天壤之內山川草木蟲魚
之類皆吾作樂事也

與千乘姪一首 黃州

念二秀才別來又復春深相念不去心邁自北還得手書及見數
詩慰喜不可言日月不居菴已除服哀念忽忽如何可言久不得
鄉書想諸叔已下各安子明微累想免矣因書畧報大舅書中甚
相稱更在勉力副尊長意家門凋落逝者不可復如老叔固已無
望而子明子由亦已潦倒頭顱可知正望姪輩振起耳念此可不
加意末由會合千萬自愛

與千之姪二首 離黃州

必強姪近在泗州得書喜知安樂房眷子孫各無恙秋試又不利
老叔甚失望然慎勿動心益務積學而已人苟知道無適而不可

初不計得失也聞姪欲暫還鄉信否叔舟行幾一年近於陽羨買
得少田意欲老焉尋奏乞居常見邸報已許文字必在南都此行
畧到彼葬却老姊二姨子由乾姊也住二十日却乘舟還陽羨姪能
來南都一相見否叔甚欲往見傳正自惟罪廢之餘動輒累人
故不果爾甚有欲與姪言者非向莫盡想不憚數舍之遠也寒暖
不定惟萬萬自愛

二

獨立不懼者惟司馬君實與叔兄翁耳萬事委命直道而行縱以
此竄逐所獲多矣因風寄書此外勤學自愛近來史學凋廢素歲
作試官問史傳中事無一兩人詳者可讀史書為益不少也

付邁一首

以下俱惠州

古人有言有若無實若虛況汝實無而虛者耶使人謂汝庸人實
無所能聞於吾者乃吾之望也慎言語節飲食晏寢早起務安其
形骸為善也臨書以是告汝付邁

付過二首

詩有寫物之功桑之未落其葉沃若他木殆不可以當此林逋梅
花詩云疎影橫斜水清淺暗香浮動月黃昏決非桃李詩也皮日
休白蓮詩云無情有恨無人見月曉風清欲墮時決非紅蓮詩此

乃寫物之功若石曼卿紅梅詩云認桃無綠葉辨杏有青枝此至
陋蓋村學中語

二

硯細而不退墨紙滑而字易燥皆尤物也吾平生無嗜好獨好佳
筆墨既得罪謫海南凡養生具十無八九佳紙墨行且盡至用此
等將何以自娛爲之慨然書付子過

與姪孫元老四首

以下俱
儋耳

姪孫元老秀才久不聞問不知識卽尊體中佳否蜀中骨肉想不
住得安訊老人住海外如昨但近來多病瘦瘁不復如往日不知
餘年得相見否循惠不得書久矣旅况牢落不言可知又海南連
歲不熟飲食百物艱難又泉廣海舶不至藥物鮓醬等皆無厄窮
至此委命而已老人與過子相對如兩苦行僧爾胸中亦超然自
得不改其度知之免憂所憂志文但數年不死便作不食言也姪
孫旣是東坡骨肉人所觀看往京凡百加關防切祝切祝今有一
書與許下諸子又恐陳浩秀才不過許只令付與姪孫切速爲求
便寄達餘惟萬萬自重不一

二

姪孫近來爲學何如想不免趨時然亦須多讀史務令文字華實

東坡集卷二十一
三
相副期於適用乃佳勿令得一第後所學便爲棄物也海外亦粗
有書籍六郎亦不廢學雖不解對義然作文極峻壯有家法二郎
五郎見說亦長進曾見他文字否姪孫宜熟看前後漢史及韓柳
文有便寄近文一兩首來慰海外老人意也

三

元老姪孫秀才屢得書感慰十九郎墓表本是老人欲作今豈推
辭向者猶作寶月志文況此文義當作但以日近憂畏愈深飲食
語默百慮而後動想喻此意也若不死終當作爾近來鬚鬢雪白
加瘦但健啖啜如故爾相見無期惟望勉力進道起門戶爲親榮
老人僵仆海外亦不恨也

四

趙先輩儋人此中凡百可問而知也鄉里出百藥煎如收得可寄
二二斤趙還時可附也無卽已

與胡郎仁修三首

以下俱北歸

某啟得彭城書知太夫人捐館聞問哀痛不已行役無便未由奉
疏人至忽辱手書伏審攀慕之餘孝履粗遣至慰某本欲居常得
舍弟書邀歸許下甚力今已決計派泚至陳留陸行歸許矣旦夕
到儀真暫留令邁一到常州款見矣未間惟節哀自重不宣

二
某慰疏言不意變故奄離艱次伏惟孝誠深篤追慕痛裂荼毒難堪奈何奈何比日攀號愈遠摧毀何及伏惟順變從禮以全純孝某未獲躬詣靈帷臨書哽咽謹奉疏慰不次

三

小二娘知持服不易且得無恙伯翁一行並健得翁翁二月書及三月內許州相識書皆言一宅康安亦得九郎書二子極長進今已到太平州相次須一到潤州金山寺但無由至常州看小二娘有所幹所關一一早道來餘萬萬自愛

與外生抑閣一首

以下俱北歸

展如外生人來得書知奉太夫人康寧新婦外孫各無恙北歸萬里無足言者獨不見我令妹賢妹夫此心如割介夫何負亦早世念之痛不去心數年豈賢雋厄會耶相見當一慟以寫之茲不二

密州與人三首

違去門下已八年愚魯罷始人事廢絕書疏缺然怠慢之罪宜在謹絕比承柄用又不以時隨衆修葺葢疎懶愧縮日復一日不知復憐怨之否卽日履茲寒凝台候萬福某去替止數月而貧困難以赴闕相次乞江浙一郡若幸得之拜見未可期惟冀爲國自重

二
右之別遂不上問至今想必察其情也特枉書問感慰兼集此
日起居何如涉海恬然繼以題擢衆論翕然知忠信之可恃名實
之相副也雅故之未忻慰可量

三

前日使車道由郡下雖展接顏表殊慰瞻係之懷惟是禮勞不腆
實深愧悚逮茲違間吏役絆撻未皇奉書以伸惓惓之情特蒙高
明遠貺珍贖披繹數四感仰交懷初暑微熱切承跋履之餘動止
佳勝未緣會集臨紙增慨

徐州與人一首

州人張天驥隱居求志上不違親下不絕俗有足嘉者近卜居雲
龍山下憑高遠覽想盡一州之勝當與君一醉他日慎勿忽忽去
也

湖州與人一首

託庇隣封每荷存記特辱榮訊愧汗可量即日履茲霜候起居住
勝未緣參見惟日瞻企尚冀以時珥衛區區

黃州與人五首

辱書承起居佳勝竒墨吾儕共寶併蒙輟惠慚悚之甚敬佩厚意

也

二

示諭燕子樓記集於公契義如此豈復有所惜況得託附老兄與此勝境豈非不肖之幸但困蹟之甚出口落筆爲見憎者所箋注兒子自京師歸言之詳矣意謂不如牢閉口莫把筆庶幾免矣雖託云向前所作好事者豈論前後卽異日稍出災厄不甚爲人所憎當爲公作耳千萬哀察

三

兩日瘡痛殊甚不果見辱簡且喜佳勝二詩高妙讀之喜慰幸甚

病中裁謝草草

四

兩日瘡痛不出思渴思渴今猶楚痛未已鍾乳丸更求數服吐血者復作也不罪不罪

五

久不奉書叠承枉教字慰感良深比日起居住佳勝汝郡務簡儒師清閒於此相從豈非甚幸區區非南莫究令兄不敢別狀乞道懇

與吳君采一首

惠化已領影燈未嘗見與其見此何如一閱三國志耶

東坡全集卷五十一
與人二首

辱教伏承尊體康勝某以拘文不克造請初不知微恙今聞已安
愈甚慰馳仰然猶當倍加保愛也

二

違濶忽復周歲思仰日深衝涉薄冷起居清勝卽獲瞻奉下情欣
躍區區併遂面盡

與黃州故人

翰林

某寵祿過分憂責至重顏衰鬢禿不復江上形容也屢乞郡未得
但懷想曩遊發於夢想也洗眼揩牙藥得之甚幸切望招意覆益
子必已採得望多寄也都下有幹示及十二十三兩先輩各致區
區忙甚未及書艾清臣亦然京師冗迫殊不款曲也

與人三首

以下俱
提州

欽服下風爲日久矣遲暮相從傾蓋如故非氣類自然抑宿昔緣
契也人來辱手教得聞起居勝常堂上康福感慰深矣某凡百如
故又得無咎切磨知幸

二

久別思詠日深衰疾多故人事弛廢過蒙手書存錄益用愧負比
日起居住勝如聞已有召命想卽超用以慰公論未間萬萬爲國

自重

三

出守幸獲相聚每得見傷然忘懷爲益多矣別來起居何如到楊
人事紛紛坐想清游可復得哉乍熱千萬保重

與人三首

以下俱揚州還朝

吏役往還得見風采爲幸已多重承存錄延顧極厚感佩無量自
別來一向冗迫不卽裁謝慙負可知今子齋郎至領手教且審起
居佳勝乍此揆隔翹想日深尚冀珍調少慰鄙願

二

辱示長箋詞旨過重適少冗迫來使不敢久稽未及占詞爲荅想
知照未甚訝也惶恐惶恐疊蒙惠長松以扶老病感佩不可言天
覺臨別時亦許寄來因到彼可爲督之藥各品方狀精詳之極非
故人留意之深何以及此未有以荅厚意但積悲感都下委示及
餘面寃

三

叠辱臨訪欲少欵奉多事因循繼以臥病負愧深矣知明日啟行
無緣面別尚冀保練

與人惠州

東坡集卷五十一
累日欲上謁竟未暇辱教承足疾未平
馳繫足疾惟葳靈仙
牛膝二味爲末密丸空心服必効之藥
一歲靈仙難得真者俗
醫所用多葉本之細者爾其驗以味極苦而色紫黑如胡黃連狀
且脆而不韌折之有細塵起向明示之斷處有黑白暈俗謂之有
鷓鴣眼此數者備然後爲真服之有奇驗腫痛拘攣皆可已久乃
有走及奔馬之効二物當等分或視臍氣虛實加減牛膝酒及熟
水皆可下獨忌茶耳犯之不復有効若常服此卽每歲收穰皂莢
芽之極嫩者如造草茶法貯之以代茗飲此効屢嘗目擊知君疾
苦故詳以奉白元素書已作稍暇詣見
木

與人四首

以下俱北歸

遠枉書教存間甚厚兼審比來起居佳勝慰感兼集寄示石刻仰
佩至意何時會合少發所懷臨書但有慨歎

二

某日望歸蜀耳終當過岐雍間徜徉少留以償宿昔之意君自名
臣子才美漸著豈復久浮沈里中宜及今爲樂異時一爲世故所
縻求此間適豈可復得耶偶記舊與彭年一詩讀之益淚下也斯
人有才而病廢故常多感慨可念可念聊復錄此奉呈想亦爲之
惘然也

三

嶺海闊絕不謂生還復得瞻奉慰幸之極此日履此秋涼起居
福少選到岸卽遂伏謁

四

某疲病加乏使令輒用手啟通問侍公雅度闊畧細謹耳然亦皇
恐不可言也

與富道人二首 杭倅

某白道人富君辱書且喜體中安適比謂再相見今旣被命遂當
北行乍遠諸事寬中保重

一一 密州

承錄示秘方及寄遺藥具感厚意然此事本林下無以遣日聊用
適意可也若恃以爲生則爲造物者所惡矣僕方苟祿出仕豈暇
爲此謹却馳納且寄之左右或異日歸田却咨請感愧之至千萬
悉之不一

與胡道師四首 黃州

龐安常爲醫不志於利得法者古畫輒喜不自勝九江胡道士頗
得其術與余用藥無以酬之爲作行草數紙而已且告之曰此安
常故事不可廢也寥寥子病求醫於胡自度無錢且不善書求余

甚急余戲之曰子粲可皎徹之徒何不與下轉語作兩首詩乎龐
二安常與吾輩游不日索我於枯魚之肆矣

二以下俱
離黃州

昨日起離中途逆風吹往北岸幾墜魚腹知之二詩錄寄到後幸
一兩字附遞至他州貴知達玉芝善守護無爲有力者所取餘惟
保愛

三

乍別遠枉專使手書且審已還舊隱起居勝常明日解舟愈遠萬
萬以時自重

四

某啟再過廬阜俯仰十有八年陵谷草木皆失故態栖賢開先之
勝殆亡其半幻景虛妄理固當爾獨山中道友契好如昔道在世
外良非虛語道師又不遠數百里負笈相從秉燭相對恍如夢寐
秋聲宿雲了然在吾目前矣幸甚幸甚

與陸子厚一首

以下俱
惠州

某啟別來歲月及爾許也涉世不已再罹憂患但知自哂爾感君
不遺手書殷勤如此且審道體安休喜慰之極惠州百凡不惡杜
門養痾所獲多矣念君棄家求道二十餘年不見異人當得異書

見許今春相訪果能踐言何喜如之舊過廬山見蜀道士馬希言
似有所知今爲何在曾與之言否黃君高人與世相忘者如某與
舍弟何足以致之若得他一見子由確錯其所未至則某可以并
受賜矣因足下致懇可得否韓朴處士多從傅同年游近傅得廣
東漕幕遂帶得來此否因見亦道意羅浮有鄧道士名守安專靜
有守皆世外良友也世外之道金丹爲上儀鄰次之服食草木又
次之而胎息三住爲本殆無出此者嵇中散云守之以一養之以
和和理日濟同乎大順然後蒸以靈芝潤以醴泉晞以朝陽綏以
五絃僕今除五絃不用外其他舉以中散爲師矣適飲桂酒一椀
醺然徑醉作書奉荅真不勒字數矣桂酒乃仙方也釀桂而成益
然玉色非人間物也足下端爲此酒一來有何不可但恐足下拘
戒錄不飲爾道家少飲和神非破戒也餘惟善愛不宣

與鄧安道四首

某啟郡中久留鶴馭時蒙道話多所開益幸甚幸甚到山竊想尊
體佳勝未卽款會但深渴仰伏暑萬萬自重不宣

二

有人託尋一劉根道人者本撫州秀才今復安在如知得去處日
速一報切切山中芥藍種子寄少許種之也

三

某啟近奉言笑甚慰懷企別來道體何如橋想益督工何日訖事
船橋尤不可緩不知已呼得斫船人與商量未惟早定却為妙此
事不當上煩物外高人但君以濟物為心必不罪煎迫也太守再
三託致意不敢不達也未相會間萬萬若時自重不宣

四

某啟一別便數月思渴不可言邇來道體何如賤疾至今未除亦
且放任不復服藥但却輩血薄滋味而已實積行無以為寄潮州
酒一瓶建亦少許不罪浼瀆乍涼萬萬保練不知鶴馭何時可以

復來郡城慰此士民渴仰之意達觀久一喧靜何必拳拳山中也
八月內且記為多采何首烏雌雄相等為妙

與何德順二首

某白道師何君足下辱書并抱朴子小神丹方極感真意此不難
修製尙卽服餌然此終是外物惟更加功靜觀也何苓之更長進
後會無期惟萬萬自重不宣

二

鄧先生聞人山後回如見為致意獨往真長策也惟早決計

